

Scogi pa su contribucion na Papiamento durante Arte di Palabra 2017

Jonathan Thiel lo mantene Papiamento como su inspiracion mundialmente

ORANJESTAD – Durante e di 9 edicion di Arte di Palabra, organisa pa Comision Arte di Palabra Aruba, a duna homenahe na dos persona cu a aporta significativamente na nos lenga Papiamento.

Di un forma masha peculiar e Comision a scoge e exitoso cantante Jonathan "Jeon" Thiel, conoci pa su cancion "Dushi Bida", como un hoben cu ta contribui grandemente na nos idioma. E ta un ehempel con por logra uzando e arte di palabra den su composicionnan.

Den combersacion cu Jonathan Thiel, kende ta yiu homber di Robert Thiel (musico) y Francia (Anchi) Thiel, nos por a nota su amor grandi pa su Papiamento, pa su isla y su nacion.

Lanta den un cas di musico, di chikito el a cuminsa busca e instrument cu mas ta yega na su curason. Canto sigur tabata un di su talentonan, su dominio di bos y su manera trankil di trece su version di e arte di palabra den su cancionnan. Siguiendo e carera di e hoben musico, por a nota su prome exito na momento

cu el a haci su debut cu e grupo Gaitas Sensacionales cu e cancion "E Gaiton".

Despues di esaki el a fungi como cantante di Basic One, semper innovando y demostrando varios cara como cantante y produciendo videonan espectacular. Y domina semper door di su pasion y amor pa su isla, loka a dun'e varios premio di cancion y produccion di aña. E

siguiente anecdota di e hoben aki lo keda graba den historia pa su curashi y fe den su propio conocimiento y dominio di musica. Na edad di 8 aña Jonathan, despues di a laga su juffrouw kere cu e por a toca piano, pa e por cualifica den e presentacion di Fin di Aña na scol, el a core drenta e studio di musica di su tata na nan cas pa e por a siña su mes rapidamente e prome notanan di

Jingle Bells. Cubri door di su siguransa e piano y su tecladonan a bira un custumber p'e. Y pa perfecciona esaki el a pidi su Tata pa dun'e les. Asina e interes den musica a crece cada dia mas y mas y el a cuminsa canta y participa desde chikito den festivalnan. Jonathan Thiel, musico, arreglista, compositor, productor ademas di su amor grandi pa Aruba ta artista di aña 2016.

E video "Dushi bida" tin un record di mas di 1.7 miyon "viewers" riba You Tube.

Remarcabel ta e stap cu e artista aki a tuma na momento cu el a haya su mes enfrenta cu un problema di salud el a bay Hulanda y a acepta Cristo den su bida. "Awe mi ta agradecido cu Dios ta duna mi e bendicion di curacion y ta guia mi y moldia mi curason pa trece mensahenan positivo pa Aruba." E hoben cantante ta enfatisa. Jonathan, e unico Arubiano cu a haya e oportunidad di firma cu e cello internacional "SONY", tin hopi plan pa futuro na unda e lo busca colaboracion cu artistanan Internacional y semper lo mantene e pensamiento pa promove Papiamento y su custumbenan mundialmente. E escogencia como un Baluarte di Aña, ta na su luga pa su indiscutibel tono di musica, e palabranan cu ta keda graba den nos mente y curason y mas ainda pa su gran amor pa su baranca, su isla natal Aruba y su lenga materno Papiamento. Pabien Jonathan Thiel, y pabien Comision Arte di Palabra Aruba.

